

# Ясврин мастерской бәрх кергтә

С. ЖЕВАГИН,  
6-номертә комплекс бригадин  
бригадир

Мана бригадт намрин тәрәнә 1200 гектар цагъан буудя тәргдсн бәәнә. Дакад эн хавр 150 гектар газрин агъуд ичмән, 50 гектар газрт горчиц, 100 гектар газрт зарм, 100 гектар газрт эрдни-шишә, 18 гектар газрин агъуд темснә культур тәргдхмн. Кесг миньгън гектар газрт овсн хадгдхмн.

Колхозин комплекс бригадс нургълдж тиим кемджәтә зурата. Тегәд тәрәнә болн малин хотин көрнъ бурдәлгънә кәдлмшиг сән чинргәгъәр, цагтнь кехин төлә мана бригадт „ДТ-54“ маркта 4 трактор, нег „Беларусь“, „РСМ-8“ маркта чиргддг 3 комбайн, эврән йовдг нег комбайн, 6 сеялк, кирсддж тәрлгънә нег сеялк кергтә. Наадк бригадсин техникиг дуньгцхд бас тедү чигәд күргхмн.

Комбайнас буудя зәблгъиг хурддулхин төлә тракторн терг олдж авх кергтә. Тракторн тергн талдан чигн кәдлмшт кергтә болхмн.

Ода колхоз эврә кесг трактормудта, селәнә әдл-ахун талдан машидтә болджах цагт, колхозд техническ гардвр кергтә. Техническ гардвр угагъар техникиг сәәнәр әдлдж болш уга. Колхозд ах сургъульта инженер, эс гидж, адг ядхтан, сән дамшлтта дадмг механик бәрхмн гиджәнәв.

Трактормудин дундин боли капиталън ясвриг колхозд кедг болдгар кехмн, энүнә төлә ясврин мастерской бәрдж авх кергтә. Машидиг эврә мастерскойдан яслгън кимд тусхмн. Улгурнь, ясвриг заводт кехлә, 2700-3000 арслнь болдж тусна, тегәд заводт машид ясхар седхмн биш.